

SOALAN NO. 71

PEMBERITAHUAN PERTANYAAN DEWAN RAKYAT

PERTANYAAN : JAWAB LISAN

**DARIPADA : TUAN MANIVANAN A/L GOWINDASAMY
(KAPAR)**

TARIKH : 9 APRIL 2014 (RABU)

SOALAN :

**Tuan Manivanan a/l Gowindasamy [Kapar] minta MENTERI
PEMBANGUNAN WANITA, KELUARGA DAN MASYARAKAT
menyatakan :-**

**(a) statistik tentang situasi kemiskinan dalam negara dalam tempoh 10
tahun dari tahun 2003 sehingga kini; dan**

(b) langkah-langkah jangka masa pendek dan jangka masa panjang bagi menangani kemelut golongan berpendapatan rendah, khususnya golongan bekerja yang miskin (working poor), memandangkan golongan tersebut senantiasa terpinggir dalam isu kemiskinan.

JAWAPAN:

Tuan Yang Dipertua,

- (a) Data kadar kemiskinan diperolehi daripada kajian Penyiasatan Pendapatan Isi Rumah (HIS) yang dijalankan oleh Unit Perancang Ekonomi (EPU), Jabatan Perdana Menteri. Bagi tempoh 2002 hingga 2012, EPU telah menjalankan 5 bancian HIS.

Hasil bancian menunjukkan kadar insiden kemiskinan pada tahun 2002 ialah 6.0. Kadar ini menurun kepada 5.7 (tahun 2004) dan 3.6 (tahun 2007). Walau bagaimanapun, kadar ini meningkat kepada 3.8 pada tahun 2009 sebelum menurun kepada 1.7 pada tahun 2012.

Pihak EPU merancang untuk mengadakan satu lagi bancian HIS pada tahun 2014.

- (b) Pihak Kerajaan amat prihatin akan cabaran yang dihadapi oleh golongan yang memerlukan. Dalam hal ini, Kementerian Pembangunan Wanita, Keluarga dan Masyarakat (KPWKM) melalui Jabatan Kebajikan Masyarakat (JKM) menyediakan pelbagai skim bantuan kebajikan kepada kumpulan sasaran yang memerlukan, termasuk golongan bekerja yang miskin supaya mereka dapat meneruskan kelangsungan hidup dengan lebih sempurna.

Sebagai langkah jangka pendek, bantuan kewangan bulanan disediakan oleh pihak JKM seperti berikut:

1. Bantuan Kanak-kanak, dengan kadar RM100 hingga RM450 sebulan dipertimbangkan kepada keluarga miskin atau keluarga ibu atau bapa tunggal yang sedang memberi jagaan anak-anak;
2. Elaun Pekerja Cacat, dengan kadar RM300 sebulan dipertimbangkan kepada Orang Kurang Upaya yang sedang bekerja tetapi pendapatannya masih rendah iaitu kurang

daripada RM1,200 sebulan, sebagai elaun insentif supaya mereka terus bekerja;

3. Bantuan Am, dengan kadar RM80 hingga RM350 sebulan dipertimbangkan kepada keluarga miskin dan kumpulan sasar yang tidak diliputi oleh Bantuan Kewangan Persekutuan yang lain;
4. Bantuan Latihan Perantis, dengan kadar RM200 sebulan dipertimbangkan kepada kumpulan sasar JKM yang bersedia untuk mengikuti latihan kemahiran atau penempatan kerja bagi menambahkan kemahiran dalam sesuatu bidang; dan
5. Bantuan Geran Pelancaran, dengan kadar maksimum RM2,700 sekaligus dipertimbangkan kepada kumpulan sasar JKM bagi memulakan projek atau pekerjaan yang boleh mendatangkan pendapatan ke arah berdikari dan tidak bergantung kepada bantuan bulanan selama-lamanya.

Berhubung langkah jangka panjang, Kementerian memberi tumpuan kepada pendekatan *productive welfare* bagi membantu para penerima bantuan kebajikan keluar daripada kepompong kemiskinan. Antara program yang diperkenalkan ialah program 1AZAM yang telah mencatatkan penyertaan sejumlah 140,296 orang di seluruh negara dari tahun 2010 hingga 2013. Program ini menyediakan peluang menjana pendapatan kepada rakyat berpendapatan rendah termasuk penerima bantuan Jabatan Kebajikan Masyarakat yang produktif agar mereka dapat hidup berdikari dan tidak berterusan bergantung kepada pemberian bantuan kebajikan.